

Peda per la dretga decisiun

La Magistraglia Grischuna vul dar peda a scolaras e scolar da sa preparar per l'empredissadi

ANDREAS CADONAU/FMR

■ **La conferenza dals Uffizis chantunals da la furmaziun professiunala è sa decida da publitgar las plazzas d'empredissadi libras pli baud. A las organisaziuns da scolastas e scolasts na plascha quai trend betg. Ellas pretendan temp per scolaras e scolar da sa preparar sin la vita professiunala.**

La gliעד giuvna che banduna la scola è tschertgada, ella ha strusch fadia da chattar ina plazza d'empredissadi. Diversas branschas han plitost fadia da recrutar empredistas ed empredists. Almain enfin uss n'ha la pandemia betg midà insatge vi da quai fatg. In aspect positiv per giuvnas e giuvens a la fin da la scola populara. Che la gliעד giuvna è tschertgada mussan inserats cumparids dacurt che tschertgan empredistas ed empredists gia per l'onn 2022. La Magistraglia Grischuna, l'uniun tergala da las personas d'instrucziun, n'ha betg plaschair dal trend dad engaschar empredistas ed empredists gia durant il segund onn da la scola superiura. In svilup che procura sulet per pressiuin vers giuvenils e geniturs. Per in zichel irritaziun ha la conferenza dals Uffizis chantunals da furmaziun procurà cun sia decisiun da publitgar las plazzas d'empredissadi passa in onn e mez avant il cumenzament dals empredissadis.

Integrà en il plan d'instrucziun

Andreas Spinax, entaifer la Magistraglia Grischuna responsabel per il stgalim superiur, ha fatg attent al plan d'instrucziun 21. In plan adattà als basegns specifics da scolaras e scolar che sa preparan da midar en la vita professiunala. Gist il segund onn dal stgalim superiur preveda fufragnadis, scolaras e scolar empredan da s'annunziar per ina plazza ed auter. Uschia ch'ils scolar èn il terz



Empredistas ed empredists èn vinavant tschertgads, per avantatg da la giuventetgna a la tschertga dad ina professiun.

FOTO SWISS SKILLS

e davos onn da scola madirs da sa decider e sutscriver in contract. «Sa decider memia baud na porta nagut.» Andreas Spinax fa attent a scolaras e scolar che stoppian avair peda da fufragnar en pliras clamadas e peda da sa preparar per l'empredissadi. «Uschiglio sa decidan els tgunsch fallà.» Per Andreas Spinax porta ina decisiun faussa era nagut als manaschis. «Tant pli sche l'empredissadi vegn interrupt.» Scolaras e scolar che possedan baud in contract d'empredissadi perdan magari il gust d'empredir durant il davos onn da scola. In impurtant onn da scola, tenor Andreas Spinax, era per cuntinuar en la scola professiunala. «Era qua preveda il plan 21 scolaziun individuala adattada als basegns da scolaras e scolar.»

Ina malchapientscha

Il manader da l'Uffizi per la furmaziun professiunala, Curdin Tuor, ha regurdà a la novitad derasada da ses uffizi en connex cun in «gentlemen's agreement». Ina cunvegna senza valor legala instradada avant blers onn per pussibilitar a giuvnas e giuvens da sa preparar senza pressiuin sin l'empredissadi. La cunvegna intimescha ils manaschis da betg sutscriver contracts d'empredissadi avant l'emprim da november. L'uffizi scriva dad ina atgna dinamica dal martgà uschia che blers manaschis na sa tegnian betg pli vi da la cunvegna. L'uffizi saja sa decida da betg mantegnair a moda artificziala la cunvegna. Vinavant ha Curdin Tuor visà a la posiziun da la conferenza dals Uffizis per la furmaziun

professiunala che scriva dad ina malchapientscha. La decisiun da publitgar las plazzas d'empredissadi quatter mais pli baud sin l'atgna plattafurma LENA na saja betg succedida per intimar da tschertgar pli baud ina plazza d'empredissadi. Ins haja sulet vuli infurmar ad uras scolaras e scolar e geniturs tge plazzas d'empredissadis che stettian a disposiziun per fufragnar.

Intermediaturs privats

S'annunziar online per ina plazza via LENA pon ins vinavant pir in onn avant il cumenzament da l'empredissadi. Sper la plattafurma LENA, finanziada dals chantuns, sa porschan instituziuns privatas per intermediar empredissadis. Ellas fan quai fitg progressiv e gudognan daners cun lur servetsch, restricziuns era pertutgant il diever da datas n'existan naginas vers ils intermediaturs privats.

Examens sco usità

(rtr) En il Grischun sa preparan il mument 1872 empredistas ed empredists sin lur examen. Cun la situaziun actuala n'è quai per blers dentant betg uschè simpel. Tscherts manaschis cun empredists èn numnadamain amez il lockdown. Tenor il manader da l'Uffizi per la furmaziun professiunala dal chantun Grischun saja la devisa quest onn da pussibilitar da far ils examens finals uschè normal sco pussibel. Spustar ils examens u far examens pli simpels na saja nagina schliaziun. Quai fasschess be pli grev ad ils empredists ed a las empredistas da fitgar pe en lur vita professiunala.